

31. Ambo etiam ab *Ayodhyæ* incolis propter indolem suam celebrabantur: petens, quia nihil appetiit ultra id quod magistro suo daturus erat; rex, quia plus dedit quam petens desideraverat.

32. Deinde *KAUTSAS*, magnus sapiens, lætus, jam rediturus, regem, qui divitias illas centum camelis atque mulis advehi jusserat, capite inclinato adstantem manu tangens, sic allocutus est:

33. “ Quid mirum, quod terra omnia desideria explet civium domini, qui legibus morem gerit? tua vero potestas cogitationem excedit, quippe ab ipso cœlo optatum tuum impetraveris.

34. “ Quodvis aliud beneficium tibi datum supervacuum foret, quia omnigenæ felicitatis particeps es: quare filium adipiscere, virtutibus suis tibi similem, sicut pater tuus te celebrandum accepit!”

35. Hoc beneficium cum regi dedisset, vir sanctus rediit ad magistrum suum: atque rex brevi tempore filium ab illo accepit, sicut animantes lucem a sole.

36. Nam uxor ejus regia filium peperit, *KÁRTIKEYÆ* similem, *BRAHMANIS* hora; quam ob rem pater filium suum *BRAHMANIS* nomine *AJAM* appellavit.

37. Erat ei eadem forma splendens, idem robur, atque eadem majestas innata: puer non diversus erat a patre, sicut lucerna non differt ab altera, qua accensa est.

38. Felicitas, cum adire vellet eum, qui scientias a magistris rite edoctus, atque juventute progerminante imprimis pulcher erat, parentis veniam petiit, sicut virgo prudens patris veniam petere solet.

39. Tunc a *BHOJA*, *Krathakaisikorum* rege, qui sororis *INDUMATIS* mariti electionem instituere volebat, atque *AJAM* juvenem accire optabat, nuntius aptus ad *RAGHUEM* missus est.

40. *RAGHUS*, conjunctionem cum rege illo egregiam putans, atque filium suum ea ætate esse videns, qua uxori ducendæ aptus esset, hunc cum exercitu misit ad opulentam *Vidarbhæ* regis urbem.

41. Paratæ erant in itinere filii regii habitationes, omnes res necessarias in tentoriis instructas habentes, et per incolarum munera ab habitationibus sylvestribus diversæ, atque ambulacris in hortis regiis similes.